

吳郡圖經續記

附錄

校勘記

記

後集





吳 地 記

後 集

陸 廣 微 撰

叢書集成初編

(補印本)

吳地記及其他一種

一九三九年十二月初版
一九六〇年五月補印

商務印書館出版

上海洪興印刷廠印刷

欽定四庫全書提要

吳地記一卷。附後集一卷。舊本題唐陸廣微撰。宋史藝文志作一卷。與今本合。書中稱周敬王六年丁亥。至今唐乾符三年庚申。凡一千八百九十五年。則廣微當爲僖宗時人。然書中虎嘯一條。稱唐諱虎。錢氏諱鏐。改爲潛墅。考五代史吳越世家。乾符二年。董昌始表錢鏐爲偏將。光啓三年。始拜鏐爲鎮海軍節度使。潤州刺史。乾寧元年。始加鏐同中書門下平章事。二年。始封鏐爲彭城郡王。天祐元年。封吳王。至朱溫篡立。始封鏐爲吳越王。安得於乾符三年。以董昌一偏將。能使人諱其嫌名。且乾符三年。亦安得預稱吳越。至錢俶於宋太平興國三年。始納土入朝。當其有國之時。蘇州正其所隸。豈敢斥之曰錢氏。尤顯爲宋人之辭。則此書不出廣微。更無疑義。王士禎香祖筆記。嘗摘其語兒亭。馮驩宅。公孫挺。陳開疆。顧冶子墓三條。又摘其琴高宅一條。於地理事實皆爲舛謬。又案乾符三年。歲在丙申。實非庚申。上距周敬王丁亥。僅一千三百九十年。實非一千八百九十五年。於年數亦復差誤。觀其卷末。稱纂成圖畫。以俟後來者添修。而此本無圖。前列吳、長洲、嘉興、崑山、常熟、華亭、海鹽、七縣。而後列吳縣、長洲縣事爲多。殆原書散佚。後人採掇成編。又竄入他說。以足卷帙。故譌異若是耶。以今世所行。別無善刻。故姑仍吳增此本。錄之以存梗概。而附訂其牴牾如右。又吳地記後集一卷。蓋續廣微之書者。不著撰人名氏。前有題詞。稱自唐王郢叛亂。市邑廢毀。或傳記無聞。或廢興不一。謹採摘縣錄。據圖經。選其確實者。列於卷後。所記建置年號。止

吳地記提要

於祥符元年疑北宋人作舊本附錄今亦併存備考焉

吳地記

唐 陸 廣微 撰

昭文 張 海鵬 訂

按史記及吳越春秋。自禹治水已後。分定九州。禹貢揚州之域。吳國四至。東互滄溟。西連荆郢。南括越表。北臨大江。蓋吳國之本界也。今郡在京師東西三千一百九十里。當磨蝎斗牛之位。列嫫女星之分野。從秦始皇併吞六國之後。至漢順帝永建四年。有山陰縣人殷重。獻策於帝。請分江置兩浙。詔司空王襲封。從錢唐江中分。向東爲會稽郡。向西爲吳郡。至陳朝貞明元年。改爲吳州。隋文帝開皇九年。改郡邑至橫山東。新立城郭。一本云。隋開皇十三年。改爲蘇州。唐武德七年。移新州。却復舊址。升爲望管縣。七鄉一百九十四戶。一十四萬三。一本作二。千二。一本作三。百六十一。兩稅茶鹽酒等錢六十九萬二千八百八十五貫七十六文。

吳縣九萬九。一本作七。千九百六十三貫三百七十三。一本無三字。文。

長洲縣九萬八千五百七十六貫五百七十六文。

嘉興縣一十七萬八千七十六貫一百二十文。

崑山縣一十萬九千五百三貫七百三十八文。

常熟縣九萬七百五十貫七百七十四一本無四字文。

華亭縣七萬二千一百八十二貫四百三十一文。

海鹽縣四萬六千五百八十一貫五十八文。

續添

吳江縣三萬六千二百六十九貫一百文。

使司割隸醬菜錢一十萬七千七百二十貫二百四一本作三十六一本作八文。

留蘇州軍事醬菜衣糧等錢一十七萬八千三百四十九貫九十八文一本作九百二文。

團練使軍資等三十一一本無十字萬六一本作七千八百三十貫文送納一本無納字上都。

地名甄胄水名通波城號闔閭臺曰姑蘇陳壤千里是號全吳昔周太王三子長泰伯次仲雍次季歷季

歷生子昌有聖瑞太王有疾泰伯仲雍以入山採藥乃奔吳文身斷髮示不可用以讓季歷子昌立是爲

西伯即文王也吳人義泰伯歸之爲王泰伯三讓弟仲雍仲雍立號勾吳所居地名殂卒葬梅里又名番

麗今鴻山而仲雍立仲雍生季簡季簡生叔達叔達生周章周章卒其後至壽夢始別築城爲宮室於平

門西北二里基址見存自泰伯至壽夢十九世壽夢生四子長諸樊次餘祭次餘昧次季札季札賢壽夢

欲立之季札讓不可乃立諸樊諸樊卒吳人固立札札不受棄室而畊之野乃止封札於延陵號曰延陵

季子而餘祭立四年吳使季子行聘諸國餘祭卒授弟餘昧立四年卒欲授位季札季札讓逃去餘昧之

子曰僚立爲諸樊之子公子光所弑在位十三年僚好炙魚非專諸炙不食諸樊之子光潛以百金令專諸進魚王僚置匕首於炙魚中刺僚死子光篡立是爲闔閭王又令刺客要離袖劍殺吳公子慶忌卽王僚子也季子歷三年還聞僚被弑乃匍匐往其墳號哭於是子光謝過於季子季子曰苟先君無廢祀民無廢主社稷有奉乃吾君子哀死事生以待天命耳有奉一本作有本

闔閭城周敬王六年伍子胥築大城周廻四十五里三十步小城八里六百六十步陸門八以象天之八風水門八以象地之八卦吳都賦云通門二八水道陸衢是也西閭胥二門南盤蛇二門東婁匠二門北齊平二門不開東門者爲越絕之故也案西閭胥門下錢本另爲一條

闔門亦號破楚門吳伐楚大軍從此門出陸機詩曰闔門勢差峩飛閣跨通波又孔子登山望東吳闔門歎曰吳門有白氣如練今置曳練坊及望館坊因此

胥門本伍子胥宅因名石碑見在出太湖等道水陸二路今陸廢門南三里有儲城越疑作吳王貯糧處十五里有魚城越王養魚處門西南五里有越來溪

盤門古作蟠門嘗刻木作蟠龍鎮此以厭越又云水陸相半泓洄屈曲故名盤門又云吳大帝蟠龍故名門內有武烈大帝廟在祀典東南二里有後漢破虜將軍孫堅墳又有討逆將軍孫策墳按圖經續記引

吳地記有孫堅妻吳夫人墓並在盤門外三里

蛇門南面有陸無水春申君造以禦越軍在巳地以屬蛇因號蛇門前漢梅福字子真爲南昌尉避王莽

亂政稱得仙棄妻子易姓名有人見福隱市卒卽此門也。

匠門又名干將門東南水陸二路今陸路廢出海道通大萊一作海沿松江下滬濱閩閩使干將於此鑄劍採五山之精合五金之英使童女三百人祭爐神鼓橐金銀不銷鐵汁不下其妻莫邪曰鐵汁不下缺有計干將曰先師歐冶鑄劍之類不銷親鑠耳以缺然成物吾何難哉可女人娉爐神常得之莫耶聞語投入爐中鐵汁出遂成二劍雄號干將作龜文雌號莫邪鰻文餘鑄得三千竝號作龜文劍干將進雄劍於吳王而藏雌劍時時悲鳴憶其雄也門南三里有封門赤門有赤欄將軍墳在蛇門東陸無水道故名赤門東南角又有魴鰻門吳郡志引作魴鰻吳曾魴鰻見因號竝非八門之數也

婁門本號嚠門東南秦時有古嚠縣至漢王莽改爲婁縣東南二里有漢吳郡太守朱梁墳本名肇避後漢和帝諱改爲梁今吳郡朱氏皆梁之後塘北有顧三老墳見存

齊門北面通毗陵昔齊景公女聘吳太子終業閩閩長子夫差兄也齊女喪夫每思家國因號齊門後葬常熟海隅山東南吳郡志引衍南字嶺與仲雍周章等墳相近葬畢化白龍冲天而去今號爲母塚墳門東二里有廬江太守關璩墳按吳郡志引吳地記云齊門齊景公與吳戰不勝以少女嫁吳太子終業所謂涕泣而女於吳者終業閩閩長子夫差兄也早亡齊女思家吳王于此作九層飛閣令女登以望齊

平門北面有水陸通毗陵子胥平齊大軍從此門出故號平門東北三里有殷賢臣申公按太平寰宇記引郡國志云申公巫臣冢在匠門西南疑此處誤衍申公二字巫咸墳亦號巫門西北二里有吳偏將軍

孫武墳西北三里有醬醋城漢劉濞築東北三里有潁川太守陸宏墳

吳縣在望□下秦始皇二十六年置漢王莽改泰德縣陳貞明元年後主復爲吳縣隋開皇九年越國公楊素移郡及縣於橫山東五里今復移城內管鄉三十戶三萬八千三百六十一坊三十

吳公子慶忌墳在縣西北三十五里今呼慶墳

步隲墳在縣西北三里東北吳郡志引作西北三里下有一百步三字隲仕吳爲驃騎將軍代陸遜爲丞相有石碑見存臨頓橋西南

周瑜墳在縣東二里瑜字公瑾廬江舒人仕吳大將軍南郡太守美姿貌時年二十四吳中皆呼爲周郎及孫權稱號謂公卿曰非周公瑾不帝矣瑜少精思音樂雖三爵之後樂有闕誤必知之則回顧時人謠曰曲有誤周郎顧

顧野王墳在橫山東平陸地遺言不起墳案吳郡志引云在橫山別隅平地不起墳野王字體倫仕陳武帝爲門下侍郎博綜羣書廣搜經籍撰梁瑞應圖七十卷御覽三百六十卷宮人各念一卷常隨駕行內人謂之着脚御覽

姑蘇臺在吳縣西南三十五里閩閩造經營九年始成其臺高三百丈望見三百里外作九曲路以登之射臺在吳縣橫山安平里鴨城在吳縣東南二十里

匠門外沙里中。吳郡志引下有吳王築以養鴨六字。城東五里有豬墳。是吳王畜豬之所。東二里有豆園。吳王養馬處。又有雞陂。闔閭置豆園在陂東。

織里。今織里橋。在麗娃鄉。俗呼失履橋。利娃鄉。訛也。

澹臺湖在吳縣東南十里。孔子弟子澹臺滅明字子羽宅。陷爲湖。湖側有墳。

夏駕湖。壽夢盛夏乘駕納涼之處。鑿湖爲池。置苑爲囿。故今有苑橋之名。

蔡經宅在吳縣西北五十步。經後漢人有道術。練大丹。服菖蒲。得仙。今蔡仙鄉卽其隱處也。

馮驩宅在吳縣東北二里五十步。驩。孟嘗君門下客。今有彈缺巷。其墳在側。石碑見存。

長洲縣望在郡下。貞觀七年。分吳縣界以苑爲名。地名茂苑。水名僊山鄉。東一百里有秦時古嚠縣。王莽改爲婁縣。北三里有甬溪。廣八里。深四丈。而入太湖。北四十二里有湖。廣四里。深三丈。縣北二十七里有岑陂。夏駕陂。馬的陂。吳國古有此。管坊三十。鄉三十。戶二萬三千七百。

華池在長洲縣大雲鄉安昌里。

華林園在長洲縣華林橋。橋。吳郡志引作里。

南宮城在長洲縣干將鄉長樂里。

嘉興縣。本號長水縣。在郡南一百四十三里。周敬王十年置。在谷口湖。秦始皇二十六年重移。改由拳縣。景龍三年。嘉禾野生。改嘉禾縣。吳赤烏二年。避吳王太子名。改嘉興縣。前有晉妓錢唐。蘇小小墓。東五里。

有天心池。東二里有會稽太守朱買臣墳。西五百步有晉兵部尚書徐恬宅。捨爲靈光寺。縣北三十里有橋里地。是吳越戰敵處。縣南一百里有語兒亭。勾踐令范蠡取西施以獻夫差。西施於路與范蠡潛通。三年始達於吳。遂生一子。至此亭。其子一歲能言。因名語兒亭。越絕書曰。西施亡吳國後。復歸范蠡。同泛五湖而去。東二十五里有長谷亭。入華亭縣。西北行七十里。有震澤。今升縣望。管鄉五十戶。二萬七千五百四。

崑山縣在郡東七十里。地名全吳。水名新陽。貞觀十三年。分在吳縣東置縣。東南一百九十里。一作步。有晉將軍袁山松城。隆安二年。築時爲吳郡太守。以禦孫恩軍。在滬瀆江濱。半毀。江中山松能楷書。梁武帝評其書云。山松書如深山道士。見人便欲縮頭。卒贈司空將軍。葬橫山東二里。會昌四年。升縣。管鄉二十四戶。一萬三千九百八十一。

常熟縣在郡北一百里。漢建安二年。分吳縣海虞置。本號海虞縣。至唐貞觀九年。改常熟縣。北一百九十里。有孔子弟子言偃宅。中有聖井。闊三尺。深十丈。傍有盟即壇也。盟北百步有浣沙石。可方四丈。縣北二里有海隅山。仲雍周章並葬山東嶺上。闔閭三子。長曰終業。婚齊女。蚤亡。亦葬此山。山有三洞穴。穴側有石壇。周廻六十丈。山東二里有石室。太公呂望避紂之處。山西北三里有越王勾踐廟。郭西二里有夫差廟。拆姑蘇臺造。管鄉二十四戶。一萬三千八百二十。

華亭縣在郡東一百六十里。地名雲間。水名谷水。天寶五年置。蓋晉元侯陸遜宅。造池亭華麗。故名。有陸

遜陸機陸瑀三墳在東南二十五里橫山中有鶴鳴鶴唳元鶴管鄉二十二戶一萬二千七百八十。海鹽縣在郡東南二百二十里地名殷水水名福見秦始皇二十六年置陷爲柘湖又改武原縣陷爲當湖。隆安五年改東武洲移在故邑上。咸康七年改禦越復號海鹽縣。陳貞明元年割屬鹽官。廣德七年隸歸嘉興。景隆二年重置。光天二年廢。開元五年刺史張廷珪奏請重置縣東十一里有晉穆公何皇后宅十五里有公孫捷田開疆古冶子三墳俱事齊景公勇烈有功於景公爲晏子佞以桃二顆令言功三人同日而死葬于此縣東南三十里有秦柱山有五百童女避秦始皇難於此後竝得仙縣西五里有會稽山是陸華兄弟尋金牛之處管鄉一十五戶一萬三千二百會昌四年升爲縣。虎邱山避唐太祖諱改爲武邱山又名海湧山在吳縣西北九里二百步闔閭葬此山中發五郡之人作冢銅槨三重水銀灌體金銀爲坑史記云闔閭冢在吳縣閭門外以十萬人治冢取土臨湖葬經三日白虎踞其上故名虎邱山吳越春秋云闔閭葬虎邱十萬人治葬經三日金精化爲白虎蹲其上因號虎邱秦始皇東巡至虎邱求吳王寶劍其虎當墳而踞始皇以劍擊之不及悞中于石遺跡尙存其虎西走二十五里忽失案吳郡志引吳地記失字下作因名其地曰虎嚙于今虎嚙唐諱虎錢氏諱嚙改爲潁墅劍無復獲乃陷成池古應作故號劍池池傍有石可坐千人號千人石其山本晉司徒王珣與弟司空王珣之別墅咸和二年舍山宅爲東西二寺立祠於山寺側有貞娘墓吳國之佳麗也行客才子多題詩墓上有舉子譚銖作詩一絕其後人稍稍息筆

花山在吳縣西三十里。其山蒼鬱幽邃。晉太康二年。生千葉石蓮花。因名。山東二里有胥葬亭。吳王闔閭置亭。東二里有館娃宮。吳人呼西施作娃。夫差置。今靈巖山是也。晉太尉陸玩舍宅置寺。宮旁有石鼓。大三十圖。吳志云。其鼓有兵則鳴。晉隆安二年。賊孫恩作亂。鼓鳴。山上有池。旱亦不涸。中有蓴甚美。夏食之。則去熱。吳中以為佳品。

支硎山在吳縣西十五里。晉支遁。字道林。嘗隱於此山。後得道。乘白馬升雲而去。山中有寺。號曰報恩。梁武帝置。

峯嶸山在吳縣西十二里。吳王僚葬此山中。有寺。號思益。梁天監二年置。

餘杭山。又名四飛山。在吳縣西北三十里。有漢豫章太守陸烈墳。東二里有漢山陰縣令陸寂墳。山有白土如玉。甚光潤。吳中每年取以充貢。號曰石脂。亦曰白堊。白蠟。東三里有夫差義子墳十八所。按史記。索隱。吳太伯世家。注引吳地記云。餘杭山。一名卑猶山。舊府志。陽山。一名秦餘杭山。又名四飛山。引吳地記。以四面視之。勢若飛動也。圖經續記云。夫差墓在吳縣西餘杭山之卑猶位。今名陽山者是也。宰詔亦葬其旁。據此。疑下條之卑猶山。即卑猶之訛本一條。誤為二。而又有脫佚耳。

橫山。又名據湖山。在吳縣西南十六里。中有朱植墳。朱植。吳郡志引作朱桓。疑形訛。或避宋諱也。及晉門下侍郎陸雲墳。

雞籠山在吳縣西三十里。以形似雞籠。因名。晉太康二年。司空陸玩葬此山。掘地得石鳳。飛去。今鳳凰墩。

是也。陸玩字士瑤，爲左僕射。蘇峻之難，與兄暉隨帝在石頭城，以暉玩吳民之望，不敢加逼遷。既登公輔，嘗歎息謂賓客曰：「我爲三公，是天下無人其謙抑若是疾薨，以佐命之勳，特置七十家守墳。」子納字祖言，訥玩之弟，云子誤也。清操絕俗，不改素業，爲吳興守，至郡不受俸祿，征討大都督謝安詣納，殊無供辦，茶果清談而退，終尙書令，亦葬此山。

昇猶山在吳縣西二十里。吳太宰豁所葬，豁，楚伯州犂之孫。楚誅伯州犂，奔吳，吳以爲大夫，讒佞夫差而誅子胥，后句踐滅吳，誅豁以其不忠也。

女墳湖在吳縣西北六里。越絕書曰：夫差小女字幼玉，見父無道，輕士重色，其國必危，遂願與書生韓重爲偶，不果，結怨而死。夫差思痛之，金棺銅槨，葬閭門外。其女化形而歌曰：「南山有鳥，北山張羅，鳥旣高飛，羅當奈何。」志欲從君，讒言孔多，悲怨成疾，沒身黃壚。又趙曄吳越春秋云：闔閭有女愛怨王先食蒸魚，乃自殺。王痛之，厚葬於閭門外。其女化爲白鶴，舞於吳市，千萬人隨觀之，後陷成湖。今號女墳湖。吳郡志引云：吳王葬女，取土成湖。太平御覽引云：閭門外女墳者，闔閭女墓。文石爲槨，藏金玉珍玩，以人從死。高墳深池，池水成湖，文皆小異。

流杯亭在女墳湖西二百步。闔閭三月三日泛舟遊賞之處。吳郡志引下有今基隄猶存五字。

太湖按漢書志云：爾雅十藪曰吳越之間有具區。郭璞云：今吳縣西南太湖卽震澤也。中有包山，去縣一百三十里。其山高七十丈，周迴四百里，下有洞庭穴，人潛行水底，無所不通，號爲地脈。又有大小二雷山。

按越絕書曰太湖周迴三萬六千頃亦曰五湖虞翻云太湖有五道之別故謂之五湖國語曰吳越戰於五湖在笠澤一湖耳張勃吳錄云五湖者太湖之別名以其周行五百里以五湖爲名周處風土記曰舜漁澤之所也揚州記曰太湖一名震澤一名洞庭今湖中包山有石穴其深莫知其極卽十大洞天之第九林屋洞天也洞庭山記曰洞庭有二穴東南入洞幽邃莫測昔闔閭使令威丈人尋洞秉燭晝夜而行繼七十日不窮而返啓王曰初入洞口狹隘僂僂而入約數里忽遇一石室可高二丈常垂津液內有石牀枕硯石几上有素書三卷持回上於闔閭不識乃請孔子辯之孔子曰此夏禹之書竝神仙之事言大道也王又令再入經二十日却返云不似前也唯上聞風水波濤又有異蟲撓人撲火石燕蝙蝠大如鳥前去不得丈人姓毛名萇號曰毛公今洞庭有毛公宅石室并壇存焉

松江一名松陵又名笠澤左傳曰口越伐吳禦之笠澤其江之源連接太湖一江東南流五十里入小湖一江東北流二百六十里入於海一江西南流入震澤此三江之口也咸仲云松容也容裔之貌尙書云三江旣入震澤底定是也晉張翰仕齊王問在京師見秋風起思松江鱸魚膾遂命駕東歸俄而問敗人皆謂之見機卒葬橫山東五里

唐曹恭王廟在松江恭王太宗第十四子調露元年則天皇后出爲蘇州刺史百口橋後漢郡人顧訓家有百口五世同居鄉人效之共議近宅造百口橋以彰孝義也

乘魚橋在交讓濱郡人丁法海與琴高友善高世隱不仕共營東臯之田時歲大稔二人共行田畔忽見

一大鯉魚長可丈餘。一角兩足雙翼。舞於高田。法海試上魚背。靜然不動。良久遂下。請高登魚背。魚乃舉翼飛騰。沖天而去。

琴高宅在交讓瀆。法海寺西五十步。法海寺。濟陽丁法海舍宅所置。法海蓋丁令威之裔。殿宇浮圖下有令威煉丹井也。

臯橋在吳縣北三里有五十步。漢議郎臯伯通字奉卿所居。因名。伯通卒。葬胥門西二百步。號伯通墩。高士梁鴻隱居伯通廡下。爲人賃舂。每歸。妻爲具食。舉案齊眉。伯通察而異之。曰。彼傭能使其妻敬之如此。非凡人也。舍之於家。鴻潛閉門著書十餘篇。疾困。告主人曰。昔延陵君葬于贏博之間。不歸鄉里。慎勿令我子持喪歸去。乃卒。伯通等求葬地於吳。要離塚傍。咸曰。要離烈士。伯鸞清高。宜令相近。葬畢。妻子歸扶風。

都亭橋。壽夢於此置都驛。招四方賢客。基址見存。

炭渚橋。吳時海渚通源。後沙漲爲陸。基址見存。

定跨橋。闔閭於行苑內置游賞之處。基址見存。

重元寺。梁衛尉卿陸僧瓚。天監二年。旦暮見住宅有瑞雲重重覆之。遂奏請舍宅爲重雲寺。臺省誤寫爲重元。時賜大梁廣德重元寺。

乾元寺。晉高士戴顓舍宅置。乾元初。蘇州節度採訪使鄭桂清書寺額。奉敕依年號爲乾元寺。